



# basic education

Department:  
Basic Education  
**REPUBLIC OF SOUTH AFRICA**

## NATIONAL SENIOR CERTIFICATE

**LIBANGA 12**

**SISWATI LULWIMI LWASEKHAYA (HL)**

**LIPHEPHA LESIBILI (P2)**

**LWETI 2013**

**EMAMAKI: 80**

**SIKHATSI: 2½ ema-awa**

**Leliphepha linemakhasi la-21.**

**TICONDZISO KULABAHLOLWAKO**

1. Fundza lelikhasi ngembikwekutsi ucale kuphendvula imibuto.
2. Ungalifundzi lonkhe liphepha lemibuto. Buka lokucuketfwe ekhasini lelilandzelako bese ubeka luphawu kulowo nalowo mbuto lobutwe ngetincwadzi lotifundze lonyaka. Emva kwaloko, fundza leyo mibuto lenetimpawu kuphela bese ukhetsa leyo lofuna kuphendvula yona.
3. Liphepha lemibuto licuketse TIGABA LETINTSATFU:  

SIGABA A:	Tinkondlo	(30)
SIGABA B:	Inoveli	(25)
SIGABA C:	Umdlalo	(25)
4. **ISIHLANU IMIBUTO** lefanele uyiphendvule seiyonkhe: ESIGABENI A imibuto mitsatfu (3), ESIGABENI B munye (1), ESIGABENI C munye (1) ngalendlela:  
  
SIGABA A: TINKONDLO  
  
Phendvula imibuto ibe MIBILI yeTINKONDLO LETIFUNDVWE EKLASINI.  
Phendvula umbuto MUNYE ETINKONDLWENI LETINGAKAFUNDVWA EKLASINI.  
  
SIGABA B: INOVELI  
  
Phendvula umbuto ube MUNYE.  
  
SIGABA C: UMDLALO  
  
Phendvula umbuto ube MUNYE.
5. KUKHETFWA KWETIMPHENDVULO TESIGABA B (INOVELI) NESIGABA C (UMDLALO)
  - Phendvula KUPHELA imibuto yenoveli loyifundzile kanye nemdlalo lowufundzile.
  - Phendvula UMBUTO MUNYE WENDZABAMBHALO KANYE NAMUNYE UMBUTO EMIBUTWENI LEMIFISHA. Uma ukhetse kuphendvula umbuto wenzabambhalo ESIGABENI B, uphokelekile kutsi uphendvule imibuto lemifisha ESIGABENI C. Uma uphendvule imibuto lemifisha ESIGABENI B, uphokelekile kutsi uphendvule umbuto wenzabambhalo ESIGABENI C.  
Sebentisa luhlu lwekutikhumbuta kute usitakale.
6. BUDZE BETIMPHENDVULO
  - Imibuto yenzabambhalo etinkondlweni kufanele iphendvulwe ngemagama la-190–240.
  - Indzabambhalo yenoveli nemdlalo kufanele iphendvulwe ngemagama la-340–390.
  - Budze betimphendvulo temibuto lemifisha bufanele buhambisane nelinani lemamaki labekiwe. Labahlolwako kufanele banganhlanhlatsi.

7. Fundzisisa kahle ticondziso letisekucaleni kwaleso naleso sigaba.
8. Tinombolo tetimphendvulo atihambisane naleto temibuto njengobe tinjalo ephepheni lemibuto.
9. Cala LESO NALESO sigaba ekhasini LELISHA.
10. Bhala ngesandla lesibonakalako nalesifundzekako.
11. Siphakamiso sekulawulwa kwesikhatsi:

SIGABA A: Lokungenani emaminithi la-40  
SIGABA B: Lokungenani emaminithi la-55  
SIGABA C: Lokungenani emaminithi la-55

**LIKHASI LALOKUCUKETFWE**

Lelikhasi litawusita bahlolwa kutsi bakwati kukhetsa imibuto labafuna kuyiphendvula ngaphandle kwekufundza lonkhe liphepha lemibuto.

<b>SIGABA A: TINKONDLO</b>		
<b>Tinkondlo Letimisiwe: Phendvula nobe nguYIPHI imibuto LEMIBILI</b>		
<b>INOMBOLO YEMBUTO</b>	<b>UMBUTO</b>	<b>LIKHASI</b>
1 Waze Wabagwinya!	Umbuto loyindzabambhalo	6
<b>NOBE</b>		
2 Kuhle Ketfu!	Imibuto lemifisha	7–8
<b>NOBE</b>		
3 Ntfombi Yetimanga	Imibuto lemifisha	8–9
<b>NOBE</b>		
4 Imfihimfihlo Yetimfihlo	Imibuto lemifisha	9–10
<b>NA</b>		
<b>Inkondlo lengakafundvwa eklassini: Phendvula nobe ngumuphi umbuto ube MUNYE.</b>		
5 Mbalane Yesihlengeni	Umbuto loyindzabambhalo	11
<b>NOBE</b>		
6 Mbalane Yesihlengeni	Imibuto lemifisha	12
<b>SIGABA B: INOVELI</b>		
<b>Phendvula umbuto MUNYE.</b>		
7 Liphume Nebovu	Umbuto loyindzabambhalo	13
<b>NOBE</b>		
8 Liphume Nebovu	Imibuto lemifisha	13–14
<b>NOBE</b>		
9 Kubamba Letingelako	Umbuto loyindzabambhalo	15
<b>NOBE</b>		
10 Kubamba Letingelako	Imibuto lemifisha	15–16
<b>SIGABA C: UMDLALO</b>		
<b>Phendvula umbuto MUNYE.</b>		
11 Kwahlwa Emini	Umbuto loyindzabambhalo	17
<b>NOBE</b>		
12 Kwahlwa Emini	Imibuto lemifisha	17–19
<b>NOBE</b>		
13 Umvuzo	Umbuto loyindzabambhalo	19
<b>NOBE</b>		
14 Umvuzo	Imibuto lemifisha	20–21

**CAPHELA:** Esigabeni B na-C, phendvula YINYE INDZABAMBHALO naMUNYE umbuto WEMIBUTO LEMIFISHA.

**LUHLA LWEKUTIKHUMBUTA**

Lelikhasi litawusita bahlolwa ekukhetseni imibuto labafuna kuyiphendvula ngaphandle kwekufundza lonkhe leliphepha lemibuto.

	<b>TINOMBOLO TEMIBUTO</b>	<b>LINANI LEMIBUTO LEPHENDVULWAKO</b>	<b>THIKHA</b>
<b>A: Tinkondlo</b> (Tinkondlo letifundvwe eklassini)	1–4	2	
<b>A: Tinkondlo</b> (Inkondlo lengakafundvwa eklassini)	5–6	1	
<b>B: Inoveli</b> (Indzabambhalo nobe imibuto lemifisha)	7–10	1	
<b>C: Umdlalo</b> (Indzabambhalo nobe imibuto lemifisha)	11–14	1	
<b>CAPHELA:</b> Esigabeni B na-C, phendvula YINYE INDZABAMBHALO NAMUNYE umbuto WEMIBUTO LEMIFISHA.			

**SIGABA A: TINKONDLO****TINKONDLO LETIFUNDVWE EKLASINI**

Khetsa tinkondlo tibe TIMBILI kuleti letilandzelako uphendvule ngato imibuto letawulandzela.

**UMBUTO 1**

Fundza lenkondlo lelandzelako bese uphendvula imibuto letawulandzela.

**WAZE WABAGWINYA! – ESN Mathunjwa**

- |    |  |
|----|--|
| 1  | Wash'umpompolota ushaya kancane,           |
| 2  | Wanyelel' uphuma emgodzini wemayini,       |
| 3  | Sewutfunywe sinini sakho                   |
| 4  | Kuyewubalandza uyebasebentisa kamatima.    |
| 5  | Wate wabelesela kutsi baphume              |
| 6  | Bavalelis, etinini tabo,                   |
| 7  | Ngobe sebahamba emalombo,                  |
| 8  | Emalangelanga bayolala kulesisukati sakho. |
| 9  | Sewubagwinye ngetinkhulungwane,            |
| 10 | Uphum' unyelela kants' ubebile,            |
| 11 | Pho awubahlebeli ngani batise tihlobo!     |
| 12 | Ufuna kubagwinya siphetho?                 |
| 13 | Nako-ke sewubahlangabetile,                |
| 14 | Utsi utawubuye ubagwinye                   |
| 15 | Ekupheleni kwenyanga,                      |
| 16 | Uyobuy' uyobahlantel' eMphumalanga.        |
| 17 | 'Sidziniwe kumbana nalomgodzi              |
| 18 | Sekudzala sagcina emakhaya,                |
| 19 | Kuhle nje ngobe seiyowuphela inyanga       |
| 20 | Umuntfu uyoke atsi kuphumula.'             |
| 21 | Hhawu sesifikile eBhova!                   |
| 22 | Mafufunyane nangu asontsana                |
| 23 | Aw' umkami nebantfwabami!                  |
| 24 | Ngafel, esigangeni ngingumnumzane?         |
| 25 | Waze wasigwinya sitimela.                  |

Bhala indzatjanambhalo lapho uveta khona luvo lwakho ngebuhle nebubi baloko sonkondlo lokwamenta abhale lenkondlo lengenhla.

Budze bemphendvulo yakho abube ngemagama langabi ngaphasi kwala-190 kodvwa angabi ngetulu kwala-240.

**[10]****NOBE**

**UMBUTO 2**

Fundza lenkondlo lelandzelako bese uphendvula imibuto letawulandzela.

**KUHLE KETFU! – OA Bhiya**

- |    |  |
|----|--|
| 1  | Kusemtsimbeni lomangalisako,                 |
| 2  | Kusemgidvweni lowesabekako,                  |
| 3  | Bapheleketeli bamakoti banyukubele           |
| 4  | Buso betibukeli buncumile                    |
| 5  | Bahlabelela kungatsi bakhatsele,             |
| 6  | Makoti ucambalele tfwi!                      |
| 7  | Lomshad' uyamangalisa!                       |
| 8  | Umlobokati wembets' iveyili yelipulango      |
| 9  | Umyeni wembetse letimnyama,                  |
| 10 | Buso babo buphaphatsekile                    |
| 11 | Imiphefumulo yab' ikhatsatekile.             |
| 12 | Talukati atililiteli,                        |
| 13 | Emajaha akaphoseki,                          |
| 14 | Tintfombi atigidz' ekudzeni                  |
| 15 | Bantfwana bamunya tityupha emlonyeni,        |
| 16 | Kungabe bayewulala badleni!                  |
| 17 | Iwil' insika yelikhaya.                      |
| 18 | Sicumbi setivakashi siyashuca,               |
| 19 | Libandla lebafundisi liyahuba,               |
| 20 | Bayolim' ensimini lengafulwa.                |
| 21 | Likhaba lalensimi liyababa,                  |
| 22 | Likhaba lalensimi alibonwa.                  |
| 23 | Umbhishobhi ubusisa umlobokati,              |
| 24 | Umbhishobh' ubheka emculwini                 |
| 25 | 'Lutful' elutfulini, umphefumulo kumnikati.' |
| 26 | Liyakhemetel' etibukelini                    |

- 2.1 Kuto tonkhe tinhlobo tetinkondlo lotifundze lonyaka, lena lengenhla yona utsi iluhlobo luni? (1)
- 2.2 Ase usho kwekutsi yini lengubo yelipulango lakhuluma ngayo sonkondlo lapha emgceni 8 walenkondlo. (1)
- 2.3 Chaza kutsi sonkondlo ufuna kusitjelani nganankhu umugca wenkondlo lolandzelako:
- Lutful' elutfulini, umphefumulo kumnikati. (Umugca 25) (1)

- 2.4 Shano luhlobo lwebunkondlo lolwakhiwa ngulemisindvo lecindzetelwe kulomusho wenkondlo lolandzelako:  
**Sicumbi setivakashi siyashuca. (Umugca 18)** (1)
- 2.5 Chaza wakho umbono wekutsi ngabe lesihloko salenkondlo sibumbene yini nengcikitsi yalenkondlo. (2)
- 2.6 Bakhona labanye bahluti betinkondlo labatsi lensika yelikhaya lewile lapha emgceni 17 ngumuntfu lomsikati kantsi labanye batsi ngumuntfu lomdvuna. Utsini wakho umbono ngaloku? Chaza. (2)
- 2.7 Ase uchaze bunye buhle nabunye bubi banaku sonkondlo lasitjela ngako kulenkondlo lengenhla. (2)
- [10]**

**NOBE****UMBUTO 3**

Fundza lenkondlo lelandzelako bese uphendvula imibuto letawulandzela.

**NTFOMBI YETIMANGA – SR Mdluli**

- 1 Ababangaki labatiba buso bakho Ntfombi.
- 2 Ababonwa labatsi uma bahlala bakufulatsele Ntfombi,
- 3 Ngikhuluma ngawe ntsandvokati yaketfu.
- 4 Kuba kuvuka nje, embikwakho kuyahlalwa
- 5 Utikhinike ungakhatsali ungahhani.
- 6 Temhlaba netemmango utikhipha ngeliphimbokati
- 7 Sotilwimilwimi ntsandvose wababe.
- 8 Khewane ucoca nawe ahlekelele,
- 9 Likhehla uliphulula imphandla likhumbule,
- 10 Likhumbula ebusheni, kucine libunti
- 11 Likhumbule lisakhahlela yetinyawo
- 12 Somidlalodlalo yesive.
- 13 Ungumatfunywa avume sibili,
- 14 Ungumacitsa situnge mbamba,
- 15 Ungumantjilota longenamahloni nekuhleleka,
- 16 Ungumatsengisa ngenkhani etindlini tebantfu,
- 17 Ungumaphikelela wetimanga ntfombi yetimanga.
- 18 Wakho umkhuhlane ukhuba linyenti.
- 19 Bothishela bona baveta lemhlatsi ngawe
- 20 Ngobe umsebenti wekhaya utawentiwa.
- 21 Umkhuhlane ubabambe wena Sobambebele
- 22 Webafundzi.



- 3.1 Yini lebangela sonkondlo akhetse kusebentisa ligama lelitsi 'sotilwimilwimi' lapha kulenkondlo? (Umugca 7). (1)
- 3.2 Hlobo luni lwesimuntfutisi lolwakhiwa nguleligama lelicindzetelwe kulomusho wenkondlo lolandzelako?
- Ababangaki labatiba **buso** bakho Ntfombi. (Umugca 1) (1)
- 3.3 Lapha emgceni 16 walenkondlo sonkondlo utsi lentfombi yetimanga ingumatsengisa ngenkhani etindlini tebantfu. Wena ucabanga kwekutsi ukusho ngasiphi sizatfu loku? (1)
- 3.4 Yini kutsiwe lemigca yenkondlo lelandzelako imumetse bunkondlo?
- Ababangaki labatiba buso bakho Ntfombi.  
Ababonwa labatsi uma bahlala bakufulatsele Ntfombi. (Imigca 1–2). (1)
- 3.5 Ngekusho kwasonkondlo kulenkondlo, lentfombi yetimanga ayinamkhawulo nemibandzela ngekwedzala. Ngabe nawe uyavumelana yini nobe awuvumelani nalombono wasonkondlo? Sekela lokushoko ngaloko lesikutfole kulenkondlo. (2)
- 3.6 Wena ucabanga kwekutsi ubangelwa yini sonkondlo atsi umkhuhlane walentfombi yetimanga ukhuba linyenti? Chaza. (2)
- 3.7 Ngabe ligama lelitsi 'timanga' lisetjentiswe kahle yini kulenkondlo? Ngani? (2)
- [10]**

#### UMBUTO 4

Fundza lenkondlo lelandzelako bese uphendvula imibuto letawulandzela.

#### IMFIHIMFIHLO YETIMFIHLO – JJ Ncongwane

- 1 Imfihlo yetimfihlo
- 2 Lengenakwembulwa nobe nini,
- 3 Futsi lengenekelwa labaphilako,
- 4 Iyindumba lengadzalulwa
- 5 Imfihlo letfukuswa ekungatini
- 6 Kwekungati kwalabatiko nalabanyenti,
- 7 Ibhacele nebavumbululi betimfihlo.
- 8 Kub' uyatiwa mfihlo yetimfihlo
- 9 Ngabe sekuneticu takho
- 10 Letetfweswa labakwatiko
- 11 Njengobe betfweswa lebatu
- 12 Tinsuku tekuteta kwalotetfwele
- 13 Kodwa wen' awatiwa mfihlo yetimfihlo.

- |    |  |
|----|--|
| 14 | Mfihlo yetimfihlo kungakalindzelwa     |
| 15 | Uyembulek' utuse kube lusizi-          |
| 16 | Kulabasetikolweni baphuphum' ematsemba |
| 17 | Ekujubalala ngalokwa nalokwa,          |
| 18 | Batali basafisa lokuhle kodvwa,        |
| 19 | Ekufungeni kwetidzandzan' ukhona       |
| 20 | Mfihl' ungukuphela kwetintfo tonkhe.   |
| 21 | Tinjulamcondvo nabosiyati bemhlaba     |
| 22 | Abakwati mfihlo yetimfihlo.            |
| 23 | Luntfu luyafisa kukubalekela           |
| 24 | Kodvwa ngobe awubhacelwa               |
| 25 | Uyabatsatsa bayekufihlwa               |
| 26 | Emfihlweni yemhlaba.                   |

- 4.1 Wena uyiva kwekutsi yini lemfihlo yetimfihlo lakhuluma ngayo sonkondlo? (1)
- 4.2 Yini sonkondlo lasifundzisa yona nganangu umusho wenkondlo lolandzelako?  
Mfihlo ungukuphela kwetintfo tonkhe. (Umugca 19) (1)
- 4.3 Shano bunkondlo lobutfolakala kunansi imigca yenkondlo lelandzelako:  
Imfihlo letfukuswa ekungatini  
Kwekungati kwalabatiko nalabanyenti. (Imigca 5–6) (1)
- 4.4 Sonkondlo usifundzisani ngalenkondlo yakhe seiyonkhe? (1)
- 4.5 Lisu lini lebunkondlo lalisebentisile sonkondlo kuveta bunkondlo kulenkondlo  
nasibuka lemigca yenkondlo lelandzelako? Usho ngani?  
Kub' uyatiwa mfihlo yetimfihlo  
Ngabe sekuneticu takho (Imigca 8–9) (2)
- 4.6 Ngabe lesihloko salenkondlo sisho kona yini loku lenkondlo lekhluma  
ngako? Usho ngani? (2)
- 4.7 Wena ucabanga kwekutsi kubangelwa yini kwekutsi tinjulalwati netati  
temhlaba tingayati lemfihlo yetimfihlo nobe tifundze kangaka? Chaza. (2)
- [10]**

**NA**

**TINKONDLO LETINGAKAFUNDVWA EKLASINI**

Phendvula MUNYE umbuto kulena lelandzelako.

**UMBUTO 5**

Fundza lenkondlo lelandzelako bese uphendvula imibuto letawulandzela.

**MBALANE YESIHLINGENI – MD Ndlala**

- |    |   |
|----|---|
| 1  | Weta uphaphela etulu,                           |
| 2  | Wet' ufumbetse ngakhangeta.                     |
| 3  | Wayilutsa usachamuka inhliyo                    |
| 4  | Ngabon' iKhanani uta uyetfwele.                 |
| 5  | Ngakhangeta wangicambitela                      |
| 6  | Ngabona lizulu nemhlaba kufana,                 |
| 7  | Ngakusala emuva lapho uya khona                 |
| 8  | Ngakuphahla lisaphuma njengelidloli,            |
| 9  | Lashon' ungifulatsele emmangweni.               |
| 10 | Ngacela kutsi ungengete walandvula,             |
| 11 | Ngamukela ngato tonkhe tandla, wangifulatsela.  |
| 12 | Ngadvukuta ehlatsini sengitfungatsa labangemuva |
| 13 | Kwaba bucalu emuva nasembili                    |
| 14 | Ngakhala tageleta kamuva                        |
| 15 | Ngaguca, wena wangihleka bulima.                |
| 16 | Ngaphahla emadlotini nawo angifulatsela         |
| 17 | Sacitseka sebuntfu saphela.                     |
| 18 | Lashona ungifulatsele emmangweni                |
| 19 | Weta utibutsile ngakholelwa                     |
| 20 | Wet' ulungutile ngalutseka,                     |
| 21 | Wayishaya usefika yashayeka,                    |
| 22 | Ngabona inhlalakahle uta uyetfwele              |
| 23 | Ngakhangeta wangicatsatela                      |
| 24 | Ngabona sibhakabhaka nemhlaba kwefana,          |
| 25 | Ngakupheleketela ngibange lawuyakhona           |
| 26 | Ngakukhotsamela lisahlaba njengeNgwenyama       |
| 27 | Lashona ungifulatsel' emmangweni.               |

Bhala indzatjanambhalo uvete kahle kwekutsi sifundvo sini sonkondlo lasifundzisa ummango ngalenkondlo lengenhla.

Budze bemphendvulo yakho abube ngemagama langabi ngaphasi kweli-190 kodvwa kungabi ngetulu kwala-240.

**[10]****NOBE**

**UMBUTO 6**

Fundza futsi lenkondlo lesembutweni 5 bese uphendvula imibuto lelandzelako.

- 6.1 Caphuna umugca wenkondlo lapho sonkondlo asebentise khona imphindvwa kulenkondlo. (1)
- 6.2 Wena ucabanga kwekutsi bekafumbatseni lomuntfu lakhuluma ngaye sonkondlo kulenkondlo? (1)
- 6.3 LeKhanani lelapha emgceni 4 wena uyiva kwekutsi ngabe iluphawu lwani? (1)
- 6.4 Caphuna umugca lokulenkondlo lapho sonkondlo asebentise khona sidvonsamoya. (1)
- 6.5 Ase uchaze ngalokujulile kwekutsi wena uyiva kwekutsi lenkondlo lengenhla ikhuluma ngani. (2)
- 6.6 Wena ucabanga kwekutsi yini lebangela sonkondlo asebentise ligama lelitsi 'kukhotsamela' abuye afanise neNgwenyama? (2)
- 6.7 Catsanisa loku lokushiwo ngulenkondlo naloko lesikubona kwenteka emimangweni yakitsi lomuhla. (2)

**[10]****SAMBA SIGABA A: 30**

**SIGABA B: INOVELI**

Kulesigaba kunemanoveli lamabili. Wena-ke khetsa ibe YINYE loyifundze eklasini lonyaka uphendvule ngayo.

**CAPHELA:**

Khetsa emkhatsini WENDZABAMBHALO NEMIBUTO LEMIFISHA kuleyo naleyo noveli loyifundzile. Kumele uphendvule nobe ngumuphi umbuto ube MUNYE *ngaleyo noveli loyifundzile*. Uma ukhetsa kuphendvula umbuto wendzabambhalo kulesigaba, uphokelelekile kutsi ESIGABENI C uphendvule imibuto lemifisha.

**UMBUTO 7: LIPHUME NEBOVU – BB Malangwane**

Indzaba lebhaleke kahle nguleyo letsi esiphethweni sayo kusombululeke inkinga lebekubukenwe nayo endzabeni yonkhe.

Bhala indzabambhalo ubhekise endzabeni lekulenoveli ngekuphumelela nobe kwehluleka kwembhali walenoveli ekusombululeni inkinga lebekubukenwe nayo kulenoveli. Imphendvulo yakho ivete sobala kutsi lenkinga beyivetwe ngatiphi tigameko.

Indzabambhalo yakho ayibe nemagama langabi ngaphasi kwe-340 kodvwa angabi ngetulu kwe-390.

**[25]****NOBE****UMBUTO 8: IMIBUTO LEMIFISHA****LIPHUME NEBOVU – BB Malangwane**

Fundza lethekesthi leyincenye yendzaba bese uphendvula imibuto letawulandzela.

Watfukutsela wabila Lushawulo nakefika ngemphelelontfo bamtjela kutsi unina abefikile. Kwatsi nobe asefika umgijimi, wavele wala waphetsa kutsi angaphindze emukele lomuntfu lamcosha ekhaya lakhe ngetizatfu letitsite.

Njengobe unina waLushawulo abesakhulile, kantsi naye futsi akhatsatekile emoyeni, umnyaka waphela naye. Nakhona asagula kwaba yintamane yentfombi yakakhe. Nayo yabona kuncono kutsi asale sekayogulela esibhedlela ngobe besekuyintfo yelicasu nje. Abengakwati ngisho nekugucuka loku. Nangabe ake wahamba sikhatsi lesidze abemkhandza solo alele ngalolo luhlangotsi. Abesatonela nje, vele asagucuke umntfwana sibili. Esibhedlela lapha abehlolwa boLaMagagula naye dzadzewaboLushawulo. Bekatsi nakayile LaMagagula akhale ngebantfwabakhe, boKhetsile, Todvwa naMasaletindzaleni. Naye-ke waMagagula akhale ngekutsi akakwati kuta nebantfwana ngaphandle kwemvumo yaLushawulo. Ngisho nome sekashonile, Lushawulo wala kuyawubona unina. Watsi akuvele kuhambe sona lesaliwakati lesinguLaMagagula, kube nguyeyi lobona kutsi ungcwatjwa njani unina.

Kute lusizi lolwalwendlula lolwalulapho, kutsi umuntfu lomdzala angcwatjwe tiboshwa kodvwa abe anendvodzana yakhe ledla emabele. Leyo ndzaba kwaba yindlabeyiteka kuleso siganga. Kube kunyalo tintsatseli setagcwala lonkhe live, lendzaba ngabe yaphuma emisakatweni nasemaphephandzabeni.

[Likhasi 90]

- 8.1 Kushiwo ngani kuletheksthi kutsi LaMagagula usaliwakati nawubhekisa enovelini? Chaza. (2)
- 8.2 Sinjani simo semoya kuletheksthi lengenhla? Chaza. (2)
- 8.3 Kukholweka kangakanani esiveni sebantfu bendzabuko kutsi umuntfu angate angcwatjwe tiboshwa? Nika umbono wakho. (2)
- 8.4 Bhala imbangela yekwala kwaLushawulo kuya emngcwabeni wenina ubhekise enovelini. (2)
- 8.5 Lobudlelwane baLaHlophe naLushawulo bunagalelo lini ekuchubekeni kwendzaba ize iyewufika esiphetfweni? Chaza. (2)
- 8.6 DzadzewaboLushawulo besekacakekile ngekubhasobha unina. Kube bekungulesikhatsi salomuhla ngabe wayisombulula ngayiphi indlela lenkinga? Bhala tindlela letimbili lotatiko. (2)
- 8.7 Loku lokwenteka kulesicashunwa lesingenhla kuhambelana kangakanani nengcikitshi yalenoveli? Chaza. (2)
- 8.8 Umlingisi lomcoka kulenoveli utenetisa kangakanani tidzingo temlingisi lomcoka? Chaza. (2)
- 8.9 Emva kwesigameko sekugcina kulenoveli ucabanga kutsi yini lebeyifanele yentiwe nguLushawulo njengemuntfu wendzabuko nalonenkholelo yendzabuko, kugeza nembeza wakhe ngaloko lokwenteka emkhatsini wakhe nenina? (2)
- 8.10 Nangabe uyifundze kahle lenoveli, ucabanga kutsi yini leyabangela umntfwana waLaMagagula etsiwe ngekutsi nguMasaletindzaleni? (2)
- 8.11 Hlobo luni lweludvweshu lolutfolakala endzimeni yesibili kuletheksthi lengenhla? Sekela ubhekise kuLaMagagula. (2)
- 8.12 Nawufundzisisa letheksthi lengenhla uyicatsanise nesetfulo salenoveli ngabe kubumbene kangani? Sekela imphendvulo yakho. (3)

**[25]****NOBE**

**UMBUTO 9: KUBAMBA LETINGELAKO – DE Nkosi**

Indzaba lebhaleke kahle nguleyo letsi esiphethweni sayo kusombululeke inkinga lebekubukenwe nayo endzabeni yonkhe.

Bhala indzabambhalo ubhekise endzabeni lekulenoveli ngekuphumelela nobe kwehluleka kwembhali walenoveli ekusombululeni inkinga lebekubukenwe nayo kulenoveli. Imphendvulo yakho ivete sobala kutsi lenkinga beyivetwe ngatiphi tigameko.

Indzabambhalo yakho ayibe nemagama langabi ngaphasi kwe-340 kodvwa angabi ngetulu kwe-390.

**[25]****NOBE****UMBUTO 10: IMIBUTO LEMIFISHA****KUBAMBA LETINGELAKO – DE Nkosi**

Fundza lethekesthi lelandzelako bese uphendvula imibuto letawulandzela.

'Lichawe lemachawe lelo, langelaphela wena Nyoni. Lamuhla ulikhansela nje ngobe welashwa nguye nenyanga Dlamini ngekubambisana. Gamedze abekhuluma ngemtsambo munye lekumele awubuyisele endzaweni yawo, Dlamini akhuluma ngetive lekumele atikhiphe kuwe. Batsi bebabambisene bakwenta loko waphila njengasheleni. Lamuhla uphile ungumcemane,' kusho Mphikeleli.

'Ngibonga wena sihlobo sami. Nguwe lebewukadze uwa uvuka ngami. Nguwe lowangitsatsa wangiyisa kudokotela Gamedze. Ngini nobabili lenangiyisa enyangeni Dlamini. Bangelapha ngekuhlanyela. Angisesuye Matsenyoka loluhlanya lebeluhlekwa bantfu bonkhe, kudlalwa nangaye. Bengichamuka kuhlekwe, kubangwe umsindvo wentfokoto yekubona umuntfu lekumele kudlalwe ngaye. Lamuhla angisabitwa ngelaMatsenyoka, kepha nginguMatsiya Nyoni losafundze waphumelela ngekuba neticu letilandzelako LLB (UNISA),' kusho Nyoni.

'Kumele simbonge losetulu sihlobo ngaloku lasentele kona. Ngawadwabula emave ngingati kutsi ngitawuphindze nginyatsele kuleli lenkhaba yami. Ngaloletulu naku sengisekhaya. Emaphupho ami afezekile. Satfwalwa ngendiza yaseTopiya nasisuka eTanzania sita lapha eNingizimu Afrika. Kufika kwetfu lapha kwafana neliphupho. Kwaba sengatsi sesitfole inkhululeko, kantsi umshikashika usachubeka,' kusho Mphikeleli.

Wachubeka nenkhulumo yakhe Mphikeleli watsi, 'Inhlupheko ayihlali ikhona, kepha iyendlula. Konkhe lokubi lokwenteka kumuntfu akutinti, kuyendlula. Uchuba kanjani ebufundisini Mntimandze?'

'Kuchubeka kahle kakhulu Mangweni. Tigebengu ngitehlukana nebugebengu. Tiphingi ngitehlukana nebuphingi. Ngakha buntfu, bucotfo nebulungiswa esiveni. Ngikhutsata umusa, bunye, kusitana, kwatisana, kwelulekana nalokunye.'

'Chubeka njalo jaha lembutfo. Loletulu utawukupha emandla ekusebenta uphumelele. Siyakubongela ngobe walahla tonkhe tindlela letinhlahlatsako, wakhetsa yinye lefanele,' kusho Mphikeleli.

'Utsini ngelusuku lwakusasa?'

'Silindzele lona sibili. Siyawemukela loko lesiphiwe kona. Akekho lowatiko kutsi kuyawukwentekani ngaphandle kwalosetulu kuphela. Lophumelele sitamshayela tandla, simesekele ngendlela lefanele,' kusho Mphikeleli.

Bavalelisana boNyoni naShongwe bahamba baya emakhaya. Mphikeleli weva umcondvo ucinana. Wabona kutsi kumele ayewubonana nadokotela Gamedze amsite kuloku lesekumphetse. Utsite asabuke kakhe, kwabonakala kutsi Khulumile uphatsekile sekumele angene endlini. Mphikeleli wabitelwa dokotela Gamedze watemelaphela khona endlini yabo.

[Emakhasi 106-108]

- 10.1 Bhala tintfo LETIMBILI lebetigulisa Mphikeleli aze ayewubonwa ngudokotela Gamedze. (2)
- 10.2 Phawula ngekuhambisana kwalesaga lesitsi, 'Tandla tiyagezana,' naletheksthi lengenhla leyincenye yenoveli. (2)
- 10.3 Lolusuku lokukhulunywa ngalo lapha kuletheksthi lengenhla luta naluphi luntjintjo emphilweni yaMphikeleli? Chaza. (2)
- 10.4 Phawula ngesimo senkholelo kuletheksthi lengenhla. Sekela ngekuqaphuna kulabakukhulumako. (2)
- 10.5 Indlela labephila ngayo Shongwe kulenoveli beyitfolakala yenta imphilo yakhe inhlanhlatse. Sekela lombono ubhekise enovelini. (2)
- 10.6 Kukhutsala kwaMphikeleli etifundweni takhe nasekusebenteleni sive, kwaba naliphi ligalelo ebanganini bakhe boMatsiya naMsiti? Chaza. (2)
- 10.7 Phawula ngekubumbana kwalesakhiwana saletheksthi nesakhiwo salenoveli yonkhe. (2)
- 10.8 Phawula ngalomshikashika Mphikeleli lakhuluma ngawo kuletheksthi lengenhla ubhekise ekutfufukeni kwalenoveli. (2)
- 10.9 Sihloko sendzaba lesicambeke kahle kumele singabiketeli siphetfo sayo. Phawula ngesihloko salendzaba, 'Kubamba Letingelako', kutsi ngabe sona sikhethseke kahle yini nakubukwa lomgomo. (2)
- 10.10 Catsanisa imphilo yaMphikeleli latsi abeyiphila kuletheksthi lengenhla naleyo yebaphatsi betepolitiki kuleNingizimu Afrika lesiphila kuyo lomuhla. (2)
- 10.11 'Bantfwana bangumliba loya embili.' Humusha lesaga ubhekise ekuvusweni kwemuti waBangive Velakhe Zwane. (2)
- 10.12 Kubalulekile kutsi tigateko letentekako enovelini titselelane emanti kute kungabi khona kudideka kwetetsamelilwati. Phawula ngalengkulumo ubhekise elutsandweni lwaMphikeleli naKhulumile. (3)

[25]

**SAMBA SIGABA B: 25**



**SIGABA C: UMDLALO**

Kulesigaba kunemidlalo lemibili. Wena-ke khetsa ube MUNYE lowufundze eklasini lonyaka uphendvule ngawo.

**CAPHELA:**

Khetsa emkhatsini WENDZABAMBHALO NEMIBUTO LEMIFISHA kulowo nalowo mdlalo lowufundzile. Kumele uphendvule nobe ngumuphi umbuto ube MUNYE *ngalowo mdlalo*. Uma ukhetse kuphendvula umbuto wenzabambhalo enovelini, uphokelelekile kutsi kulesigaba uphendvule imibuto lemifisha. Uma ukhetse kuphendvula imibuto lemifisha enovelini, uphokelelekile kutsi kulesigaba uphendvule umbuto wenzabambhalo.

**UMBUTO 11: KWAHLWA EMINI – JJ Thwala**

Umdlalo kumele uvete ingcikitsi ngalokusobala ngobe ngiyo lengumgogodla wenzaba yonkhe. Bhala tigameko letisetjentiswe ngumbhali kugcamisa ingcikitsi yalomdlalo.

Indzabambhalo ayibe nemagama langabi ngaphasi kwe-340 kodwa angabi ngetulu kwe-390.

**[25]****NOBE****UMBUTO 12: KWAHLWA EMINI – JJ Thwala**

Fundza lethekesthi lelandzelako bese uphendvula imibuto letawulandzela.

Mkhalelwa:	Lijoka lengikwetfwesa lona lamuhla uyawulibeka phasi mhla ufulatsela lomhlaba. Ngikwetfwesa lelijoka nje ngobe uyindvodzana yami yekucala, uhlakaniphile, ucofho futsi wetsembekile.
Makhosi:	Ngiyawatsakasela emavi akho babe. Emavi akho ayangakha. Angenta ngikhutsale ekusebenteleni sive.
Mkhalelwa:	Lokunye lengitawufuna ukwente embikwekutsi ubekwe esihlalweni nobe ngemuva, kuteka. Utawubekwa kulesikhundla ngeMgcibelo lo lesiya kuwo. Kutakuwa indli'valiwe, emashumi lamane. Inyama kutawube kutidvuli tebasali. Kutawube kudliwa, kukhonjwa ngalosekhatsi. Ngikhulumile-ke nabonyoko kutsi kumele kutfolakale umhidvo, lihalatelo, lijingana nemahewu.
Makhosi:	Ngiyeva Sigegedze kutsi lusuku lwemsebenti selusemnyango. Sitakwenta njani babe, ngobe siphuma emnyameni wekulahlekelwa tindvuna letimbili boMahwabha Tfwala naSikhutane Ndlela?
Mkhalelwa:	Letindvuna betingetami. Wena utawukhetsa takho tindvuna. Kumele ukhetse emadvodza lacotfo, lahloniphekako futsi lawatiko umtsetfo wesive.

Makhosi:	Kuyevakala Sigegedze.
Mkhalelwa:	Ikhona yini imibuto letawufuna kutsi siyiphendvule nobe lapho ungacacelwa khona?
Makhosi:	Ngubani kantsi indvodzana yakaNhlapho lenkhulu? Akusuye Nkhanise yini babe?
Mkhalelwa:	Indvodzana yakaNhlapho lenkhulu nguMakhosi kulandzele Ndleleni. Emadvodza lengikubeka etandleni tawo kutsi akubonise, akusite futsi akweluleke nguMabaso naMsibi. Ngedze lo (asho amkhomba) yimbongi yesive lengitsandza kutsi ukhetse lomunye losemncane lotawuba nelikhono lekuhaya. Msibi yinyanga yesive letawuchubeka yelaphe emphakatsi nobe sesaba matsambomhlophe.
Makhosi:	Ngiyajabula kuva kutsi ungishiya etandleni taMntungwa naNdondlo. Ngiyakutsakasela kusala etandleni taMntungwa, kepha kumatima kulitje kusala etandleni taNdondlo.
Mkhalelwa:	Hawu sewutsini-ke ndvodzana?
Makhosi:	Ngikubone kukuhle kutsi ngikuvete kuwe loku babe, ngobe ngiyabona kutsi kutawungehlula. Ngiyetsemba babe angeke uphatseke kabi kuva lokungekhatsi enhlityweni yami kunekutsi ngibe ngufelekhatsi libutfo lakaZulu.
Mkhalelwa:	Ngimdzala nangingaka ndvodana. Ngimphunga enhloko. Ngiyaweve emavi akho. Angiphikisani nawe, kepha mine ngitsi ngeMgcibelo lotako tintsambo tonkhe ngitishiya kuwe. Ngiphosela kuwe konkhe, nguwe lotawubona kutsi wentanjani.
Makhosi:	Kutawufuneka ngitfole inyanga letawelapha emabutfo. (Behlukana. Kwahaya imbongi yesive).
Ngedze:	Lukhulu luyeta, Luta luyanyenyela; Lusemnyango, Bayethe!

[Likhasi 9–14]

- 12.1 Ucabanga kutsi ngubani lotawuba ngundvunankhulu lotawengamela tonkhe tindvuna njengoba Makhosi asho emdlalweni? Sekela imphendvulo yakho. (2)
- 12.2 Bekuyini inhloso yaMkhalelwa kutsi nakabala emadvodzana akaNhlapho, ligama laNkhanise angalifaki? (2)
- 12.3 Letheksthi lengenhla isisusa seludvweshu lolwenteka kulomdlalo. Sekela lombono ngalokwenteka emdlalweni. (2)

- 12.4 'Indl' ivaliwe,' lokutinkhomo letimnyama, letakhetfwa nguMkhalelwa kutsi titawuhlatjwa kulesibhimbi sekubekwa kwaMakhosi, ucabanga kutsi betiluphawu lolubiketela siphil sigameko emdlalweni? Sekela imphendvulo yakho. (2)
- 12.5 Etinhlotjeni temidlalo, ngabe lona, 'Kwahlwa Emini,' ufanele kuba ngulolalelwako, ngulobukelwako nobe ngulodlalwako na? Sekela imphendvulo yakho ngetizatfu letimbili leticinile. (2)
- 12.6 Mkhalelwa utsi, 'kutawube kukhonjwa ngalosekhatsi.' Catsanisa lesisho nalokwenteka ngeMgcibelo. (2)
- 12.7 Ngekwakho kubona, letibongo letisekugcineni kwaletheksthi lengenhla tihambisana kangakanani nesiphetho salomdlalo? Sekela imphendvulo yakho ngekuqaphuna emdlalweni. (2)
- 12.8 Nawufundza lomdlalo, kubukeka kungumcansa kuntjintja tincumo lesetitsetfwe nguMakhosi. Sekela nobe uphikise lombono ngesigameko sinye lesisemdlalweni. (2)
- 12.9 Nawubuka simo sesikhatsi, Makhosi abefanele abekwe esihlalweni ngasiphi sikhatsi semnyaka? Sekela imphendvulo yakho. (2)
- 12.10 Kube Nkhanise walalela teluleko tenina ngabe lomdlalo awuzange utfutfuke ute uyofika esiphethweni sawo. Chaza. (2)
- 12.11 Kungemaciniso nobe kungumbono yini kutsi Nkhanise abengakahlosi kubangisa Makhosi bukholo, abemangele kutsi yini uyise angamniki bukholo? Sekela imphendvulo yakho ubhekise encwadzeni. (2)
- 12.12 Hlatiya emavi aMakhosi latsi, 'Kumatima kulitje kusala etandleni taNdondlo,' ubhekise esicongweni salomdlalo. (3)  
**[25]**

**NOBE****UMBUTO 13: UMOVUZO – NS Nzima**

Umdlalo kumele uvete ingcikitsi ngalokusobala ngobe ngiyo lengumgogodla wenzaba yonkhe. Bhala tgameko letisetjentiswe ngumbhali kugcamisa ingcikitsi yalomdlalo.

Indzabambhalo ayibe nemagama langabi ngaphasi kwe-340 kodwa angabi ngetulu kwe-390.

**[25]****NOBE**

**UMBUTO 14: UMOVUZO – NS Nzima**

Fundza lethekesthi lelandzelako bese uphendvula imibuto letawulandzela.

- LaNgwenya: Inhlonipho sisekelo sesive sonkhe. Uhlonipha lomdzala, lomncane, lolingana nawe, nawe lucobo lwakho. Uhlonipha ngekubingelela, ngekukhuluma ngelivi lelipholile nalelimnandzi netento. Kulisiko lesive kwemukela intfo kulomunye umuntfu ngetandla letimbili. Kuletinye tive loko kusho bugovu, ngako-ke kumele sente kwetfu.
- LaMbuli: Ucinisile makhelwane. Tsine asimchebuli umuntfu ngesincele nome semukele intfo ngesincele. Loko akwemukeleki kitsi. Asidli futsi asiwanatsi emanti bume.
- LaNgwenya: Intfombatane ayiyishanyeli indlu kugcwele libandla. Lokunye lekumele ingakwenti kusindza endlini kunebantfu labadvuna. Kumele ulindzele libandla lihlakateke ngembikwekusindza nome kushanyela. Uma kunebantfu labadvuna bodvwa endlini, kumele lomsikati aphume abanike litfuba lekutsi baticocele tabo. Emajaha ngemakhosi!
- Batjele: Ngiyaniva bomake nitsintsa labadvuna mayelana nenhlonipho. Uma endlini kugcwele bantfu labasikati kumele lomdvuna naye aphume abanike litfuba lekutsi baticocele tabo?
- LaNgwenya: Tikhona letinye tintfo letiyinhlonipho lekumele utati ngobe tikhombisa kuhlonipha bulili lobutsite. Labadvuna kumele bahlonishwe ngulabasikati, kantsi nalabasikati kumele bahlonishwe ngulabadvuna. Kuhloniphana kumele kubonakale kubo bonkhe bulili.

[Likhasi 75]

- 14.1 'Tsandza makhelwane wakho njengobe utitsandza'. Lesicashunwa semdlalo sikukhomba ngayiphi indlela loku lokushiwo ngulesitatimende? Chaza. (2)
- 14.2 Bhala emasu lamabili lasetjentiswe ngumbhali walomdlalo ekwetfuleni luhlobo lwesikolo saseMkhuphukantsaba lapho bekufundza khona Batjele. (2)
- 14.3 Chaza ligalelo lekungabi nelitfuba lekutfole lemiyalo lekulethekesthi lengenhla etindzabeni telutsandvo nasemindenini yalomuhla. (2)
- 14.4 Nika umbono wakho njengelusha lwalomuhla kulomusho locashunwe etheksthini lengenhla. (2)
- 'Emajaha ngemakhosi!' (2)
- 14.5 Nawufundzisisa lethekesthi ubuye uyicatsanise nemdlalo wonkhe ngabe kusitsintsa ngayiphi indlela simonhlalo salomuhla? (2)
- 14.6 Kubalulekile kutsi badlali bakholweke emdlalweni. Ngabe Batjele ukholweka kangakanani njengemdlali lophilako? Chaza. (2)

- 14.7 Sibumbene ngayiphi indlela sihloko salomdlalo naletheksthi lengenhla? (2)
- 14.8 Chaza kuhambelana kwelibito laBatjele lesibili nengcikitsi yalomdlalo. (2)
- 14.9 Indlela boBatjele labatfoli ngayo imiphumela yabo yeluhlolo lwelibanga lelishumi nambili, ivule imphikiswano lenkhulu elusheni lwalomuhla. Bhala umbono wakho ngalemphikiswano. (2)
- 14.10 Phawula ngalemiyalo lanikwa yona Batjele kulesicashunwa lesingenhla ubhekise etikolweni letihlanganise tinhlanga. (2)
- 14.11 Nika sigameko sinye lesikhombisa kutsi Batjele wakuvisisa loku layalwa ngako kuletheksthi lengenhla nasemdlalweni wonkhe. (2)
- 14.12 Lenye yemiphumelamcoka lephawulwe kulomdlalo, kubamba lichaza etingcocweni temacembu nekuhlonipha imibono yalabanye. Bhala kutsi kulomdlalo bafundzi baseMkhuphukantsaba balungiselelwe ngayiphi indlela kutsi bafinyelele kuwo nabacedza sikolo. Bhala kube kutsatfu. (3)
- [25]**

**SAMBA SIGABA C: 25**  
**SAMBA SAKO KONKHE: 80**